

брату вашему? Цвете прекрасныи, виноград мой несозрелый, уже забыли естя меня брата своего; от единого отца рожденны есмы, от единого плода матери нашея великия княгини Агрены Ростиславне. И кому приказали естя меня раба своего. Солнце мое драгое, незаходимое; месец пресветлый, скоро изгibli естя; звезды восточныи, почто рано зашли естя! Лежите на земли пустешеньки, никим не брегоми естя, честныи и славныи. Почто аз прежде вас не умрох?" И жалосно вещающе: „О земля, о земля, о дуброва зеленая, возплачите со мною. Како нареку день сей“. Князь же Игорь Игоревич, встав от земли, и нача розбирати трупия мертвых, и взя тело брата своего великаго князя Юрья Игоревича, да князя Давида Игоревича Муромскаго, да князя Глеба Игоревича Коломенскаго, и иных князей местных, и сродник многих, и боляр, и принесе их во град Рязань, и похраниша их честно, а иных тут на пусе месте собираше, и нагробное пение творяще. И похраняще их и разслабленныи уды братия своея и благовернаго и великаго князя Олга Игоревича, и принесоша его во град Рязань. А честную его главу князь Игорь Игоревич до града сам донесе, и положиша его со князем Юрьем Игоревичем во единой раде. И поиде великий князь Игорь Игоревич на реку на Воронеж, где убиен бысть великий князь Феодор Юрьевич, и взя честное тело его, и плакася по нем на долг час. И пренесе его во свою область, и его благоверную и великую княгиню Еупраксею, и сына его князя Ивана Феодоровича Постника, и положиша их во едином месте. И от тоя вины зоветца Никола Зарайский.

### **Редакция Воинская. Вид 2**

*Текст по списку БАН 34.8.25*

В лето 6745-го, во 12 лето по принесении чудотворнаго Николина образа ис Корсуня града. Прииде безбожный царь Батый на Рускую землю со множеством вой татарских и ста на Воронеже близ Рязанския земли. И присла послы безделны на Рязань к великому князю Юрию Игоревичю Рязанскому, прося десятины во всем их княжестве со всяких людей. Слышав же великий князь Юрий Игоревич Рязанский приход безбожнаго царя Батия и посла во град Владимир к великому князю Георгию Всеволодичю Владимерскому, прося помощи от него на безбожнаго Батия, или бы сам шел против его. Князь же Георгий Всеволодич Владимирский сам не пошел, и помощи не посла, хотя сам от себе битися з Батыем. Се же слышав князь Юрий Игоревич, что несть ему помощи от владимирскаго князя Георгия Всеволодича, вскоре посылает по братию свою—по муромскаго князя Давыда Игоревича, по коломенскаго князя Глеба Игоревича, по князя Олга Краснаго, по Всеволода Пронскаго и по прочия князи. И начаша совещевати, яко нечестиваго дары подобает утоляти. Он же посла сына своего князя Федора Юевича Рязанскаго к безбожному царю Батыю с великими дарыи и с молением, чтобы не воевал Рязанские земли. Князь же Феодор Юрье-